

四庫全書

集部

欽定四庫全書

史部

甘肅通志卷五

詳校官監察御史臣李陽棧

檢討臣德生覆勘

總校官檢討臣何思鈞

校對官中書臣宋枋遠

臚錄監生臣金特

欽定四庫全書

甘肅通志卷五

山川

郡邑城市時有變更山川形勢終古不易紀其高深
詳其險易體國經野所宜講也兩河形勝輿區高山
擁衛於邊塞羣川縈繞於境中近接遠拱派別支分
山經水牒具載可考志山川

臨洮府

狄道縣

嶽麓山 在縣東二里宋時建東岳廟於上故名

崆峒山 在縣東北五十里府志云俗名空頭山非
平涼之崆峒也

白石山 在縣東南水經注云隴水自隴坻西北至
白石山抵狄道按水經注云山在縣東南界

抹邦山 在縣南三十里宋神宗時羌人屯兵於此
一統志云熙寧五年王韶引兵趨抹邦山逆擊破

羌於此

十八盤山 在縣東南一百里其路崎嶇有石級一

十八盤一統志云古有驛遞通岷州

碧井山 在縣東南二十里一名玉井峯峯頭有井

峯後有洞

翠屏山 在縣南六十里林木森鬱儼若翠屏

煤山 在縣南八十里明楊繼盛始開居民賴之

蓮花山 在縣西南一百五十里山聳數峯宛如蓮

花故名

珠翠山 在縣西南五十里俗名花架山

幞頭山 在縣西南三十里以形似名

常家山 在縣西南六十里與西傾山相連一統志

宋元祐二年夏人寇邊羌酋鬼章駐兵於此為宋將游師雄所破上有龍湫深廣凡九曲十八灣

西傾山 在縣西南一百五十里謂即禹貢之西傾非也蓋隴右諸山多以西傾名

西平山 在縣西五里通志云唐西平王李晟所封
其地為西平里之蘭家灣上有坪地百頃

寶鼎山 在縣西十里以峯似爐鼎故名

卧龍山 在縣西北二十里山勢蜿蜒如龍偃卧有
泉遇旱禱雨於此

夏牟山 在縣西三十里與寶鼎山相連下產牟麥
故名

龜山 在縣西北五十里以形似名

黎紫山 在縣西北八十里

黑石山 在縣西北一百里

翠微山 在縣北六十里

馬銜山 在縣北九十里史謂馬銜俗誤為寒接蘭
州金縣界其山綿亘數百里勢極高峻雖炎夏冰
雪不消

青重山 在縣東北三十五里

竹牛嶺 在縣東一統志云宋熙寧中王韶引兵度

竹牛嶺破蕃酋於此

胭脂嶺 一統志云在縣西三十里下有胭脂川

摩雲嶺 在縣北一百五十里與蘭州接界雄峻參

天上有關

胡麻嶺 在縣東北一百二十里路通安定

玉井峯 在縣東南三十里以峯頭有井而名

伏冰巖 在縣東五里谷中幽邃雖炎夏猶有伏冰

焉

阿姑山 在縣西南八十里

亥母山 在縣西南四十里上有亥母洞

滴水巖 在縣西十里水自石竇中出

隴坻 在縣東應劭曰隴西郡有隴坻在其東水經

注隴水西經隴坻其山岸崩落者聲聞數百里揚

雄稱響如頽坻是也

麝香坡 在縣西南與夏牟山近中產麝香

高峯坡 在縣東北十五里

新道坪 在縣南三十里或謂新為辛以辛氏多居
於此

嵐關坪 在縣南二十七里一名南關關口險隘坪
上高敞延袤可十餘里

墓塚坪 在縣東北三里中多古墓

故關原 在縣北三十里魏正元中王經與姜維戰
於故關不利即此相近有太平原上有平地百頃
可以屯軍

鎖林峽 在縣南六十里洮水所經兩崖聳峭如削
林木森森宛似封固故名

石井峽 在縣北一百二十里中有泉四時不竭

木婆谷 在縣東三十里

東谷 在縣東八十里一統志云宋王韶自東谷徑
趨武勝克之即此

南峪 在縣東南八十里

贊嘉谷 在縣南七十里中有龍湫池

紅道谷 在縣西南三十里一統志云明嘉靖十八年敵首火落赤入寇由紅道谷潛入遊擊劉子都戰於此

十公谷 在縣西南四十五里

通谷 在縣西六十里一統志云其谷東入西出往來不踰數十步中可容千百人上有竅見天日宋熙寧初嘗於谷口置堡

打壁谷 在縣北三十里

東巖 在縣東一里山如兩屏中建蘭若層樓飛閣
登陟其上可覽一邑之勝

西巖 在縣西三里上倚寶鼎下瞰洮流中建蘭若
高閣危樓視東岩為尤佳

丁龍谷 在縣東南二十五里內有贍學田百頃志
府文廟碑陰

水簾洞 在縣西三十里

超然臺 在縣東一里嶽麓山上古名鳳臺後宋蔣

之奇登臺眺望名曰超然有超然臺詩明楊繼
盛謫狄道典史建書院於上

洮河 在縣西二里一統志云自洮州衛東北流經
岷州流入又北入蘭州界水經注洮水自步和亭
北出門峽歷求厥川葦川水注之又北歷峽徑偏
橋出夷始梁右合葦塏川水又東北經桑城東又
北會藍川水又北經外羌城西又北經和博城東
左合和博川水又北經安故縣故城西又北經降

狄道故城西又北隴水注之又右合二水又右會
大夏川北流入黃河明一統志洮河在府城西南
源出番地流入本境盤東山峽中千數百里始經
府城南浩然奔放聲如萬雷府志洮河在城西三
里由深溝兒至府城可灌田園百餘頃年久淤塞
明萬厯乙巳知縣閻士望疏通之雍大記桓水源
出西傾山吐谷渾界禹貢西傾因桓是來注云在
隴西郡臨洮縣西書本作桓水經臨洮謂之洮水

又謂之桓水

葦川水 在縣南水經注出桑嵐西谿東流歷桑嵐川又東經葦川北又東入洮水

葦塏川 在縣南一統志云出東南石底嶺下北流注於洮

藍川 在縣南水經注源出來歷川西北谿南流歷川東北流經藍川歷水池城北又東入洮水

和博川 在縣南水經注源出和博城西南山下東

北流經和博城南又東北注洮水

邦金川 在縣南六十里一統志云宋元祐中种誼

等擊鬼章夜渡邦金川即此

抹邦河 在縣南三十里一統志云由岷山會大小

南川松樹溝水成河北流入洮河

南川水 在縣南九十里山水雄秀有大南川小南

川一統志云源出渭源舊志源出蓮花山流經抹

邦山冊說源出黃香溝北流入洮

隴水 在縣東一統志云即水經注所謂藍水也出
鳥鼠山西北歷白石山下又西北經降狄道故城
東昔漢馬援為隴西太守為狄道開渠引水而郡
中樂業即此水也又西北入洮河

東峪河 在縣東三里一統志云源出渭源縣界分
水嶺會馬兒藏南峪水成河西流狄道入洮河

小河溝 在縣北五里

三岔河 在縣西北十里東流入洮一統志云馬家

灘在縣西八十里冊說三岔水源出麻山關大馬家灘火石界內經縣西北又東北入洮蓋即水經注所謂洮水右合二水是也

打壁川 在縣北三十里源出石井峽西流入於洮
結河川 在縣北六十里有三帶水交結流入洮河
一統志云冊說源出馬銜山西流入洮

柳林溝 在縣北四十里由縣北七十里之好水溝灌地一頃二十五畝入洮河

西湖 在縣西南二里引洮水注之每年午日郡人
競遊於此

玉潤泉 在縣東三里清冷可掬

唐古泉 在縣南二十五里由清水渠至番城灌地
二百餘頃源出石岩瀑布水甚甘

石井泉 在縣北一百二十里自山破中湧出

柳林溝 在縣北五十里內產碧色洮石可作硯

佛溝 在縣南十五里山形聳翠石罅中有寺

渭源縣

鳥鼠山 在縣西二十里即禹貢導渭自鳥鼠同穴
渭水經其下爾雅其鳥名餘其鼠名鼯孔安國書
傳鳥鼠共為雌雄同穴處此山遂名漢地理志首
陽縣有鳥鼠同穴山郭璞曰鼯似鷄而小黃黑色
鼯如人家鼠而短尾穴入地三四尺鼠在內鳥在
外括地志山在縣西二十六里今名青雀山

廟坡山 在縣南二里為縣屏障以形似名

露骨山 在縣南五十里與平頂山相連宋王韶穿道入洮州即此山

平頂山 在縣南七十里其山高平昔人避兵於此
五竹山 在縣西南三十里即青雀山之支與露骨山相連盛夏積雪不消產五色細竹有岩曰秀峯
木耳山 在縣西南三十五里

南谷山 在縣西二十五里與鳥鼠山相連水經注
渭水出南谷唐大中三年吐蕃落門將論孔執遣

兵界西鄙鄯州將尚婢婢遣拓跋懷光擊破之於南谷即此

高城嶺 在縣西三國姜維圍狄道魏將陳泰度高城嶺至狄道東南山維解去水經注南谷山有高城嶺嶺上有城號渭源城渭水出焉明一統志有分水嶺在縣西十五里其水流東者入渭流西者入洮即高城嶺也

鳳凰山 在縣北五十里以形似名山上有白馬龍

池

七聖山 在縣東北五里即七峯山有七峯錯峙故名

白樺嶺 在縣南九十里路通岷州

鍬峪 在縣南五里

銀溝峪 近五竹山內有三峯

慶平山 在縣西三十里

渭河 在縣東流入鞏昌府隴西縣界禹貢導渭自

鳥鼠同穴漢志首陽縣鳥鼠同穴山渭水所出泉
眼周圍七尺四時流注東至船司空入河過郡西
行千八百七十里經西安府咸陽臨潼渭南朝邑
等縣而入黃河明一統志渭河在縣北二里源出
南谷至鳥鼠山轉而東流府志在縣西北一里二
百步有渭泉在縣西二十里即渭水源也

清源河 源出五竹山一名五竹水東北流經縣東
門又東北入渭其水甚清因名

欽峪河 在縣南七里東北流入渭

南川河 在縣南三十五里源出露骨山西流入於

洮

東峪河 在縣西二十里源出分水嶺西北流入狄
道縣界又西南入洮河水經注隴水出烏鼠山西
北高城嶺即此

通濟泉 在縣南十五里

息家泉 在縣西五里旱亦不涸

蘭州

臯蘭山 州之主山也在州南五里元和志蘭州以
臯蘭山為名九域志州南至臯蘭山四里元一統
志山在州南五里下有五眼龍泉漢霍去病擊匈
奴至臯蘭山下即此又有龍尾山在州南三里山
形如龍尾落河孺府志臯蘭山高峻渾厚左右蜿
蜒如張兩翼東西環拱州城延袤二十餘里其東
麓為紅山土色皆赤龍尾乃其西支也

龍尾山 州志即皇蘭西支也

馬寒山 在州境綿亘數百里勢極高峻雖夏永雪
不消一名馬啣山

柳溝山 在州東南四十里有黃坡下有磁窰又州
西南三十里有山亦名柳溝

白石山 在州東南八十里

天都山 在州南三十里一統志彭澤溥惠渠記阿
干水出此

樺林山 在州南三十里與馬寒阜蘭並峙

尖山 在州南四十里通河州路

嶮嶺山 在州南一百七十里一名可嶺山俗名熱

薄汗山 晉義熙四年西秦乞伏熾磐招結諸部築
城於此而據之八年乞伏公府殺乾歸奔嶮嶺南
山熾磐討殺之宋元嘉三年夏將呼盧古敗西秦
將曇達於嶮嶺進攻枹罕

瓦埠山 在州西南十里其東麓為古峰山林泉之

勝為州奇觀

石門山 在州西南水經云灑水東北經石門口山
高峻絕對岍如門

第一原山 在州西南十五里脉連瓦埠宜藝五穀
黃峪山 在州西南二十五里

九州臺山 在州北黃河北五里其形峭拔直上如
臺登之可以遠望

白塔寺山 在州北黃河北臯蘭如屏黃河如帶明

太監劉永成建白塔寺於上拱繞三關

米哈山 在州北二百餘里即大小松山番人謂肉

為米哈言此山多禽獸可資肉食也北羌犯鎮番

涼州莊浪中衛靖遠蘭州等地方必由此山以覘

虛實

摩雲嶺 在州南六十里接狄道縣界馬街支山也

高峻如在雲中

沃干嶺 在州西南三國魏正元二年陳泰救王經

於狄道時涼州軍亦從金城南至沃干坡咸和二
年張駿遣兵攻劉曜曜遣子穎屯狄道駿遣韓璞
赴救度沃干嶺而軍劉穎襲敗之於沃干嶺舊志
嶺在大夏縣東南洮水西北自涼州濟河必度此
嶺乃至狄道

捫天嶺 在州西南宋元嘉六年北涼蒙遜使沮渠
竒珍伏兵捫天嶺執沮渠成以歸

琵琶山 在州西一百三十里險峻曲折如琵琶首

因名杜佑云廣武縣有琵琶山是也

平頂峯 在州東二十五里

夜雨巖 在隼蘭山後有泉自山巔而下夜深巖靜
泉溜潺湲聽之如雨聲其水亦資灌溉俗名後五
泉

東岡坡 在州東二十五里相傳唐太宗為秦王時
獲褚亮於此

石嶮峽 在州東二十五里兩崖懸立黃河經此東

流入金縣界

女遮峪 在州東三十五里宋李憲與苗綬城蘭州
敗夏人於此

阿干峪 在州南四十里其土宜陶器經火不裂居
民取以治窯冶

煤炭山 在州南四十里阿干鎮環山俱出煤炭州
人取資利賴無窮

李麻峪 在州西四十里路通甘州

礪砂洞 在阿千里內產礪砂

榆谷 在州西一百里有大小二榆谷漢時西羌居此緣山濱水以廣田畜故致強大

黃河 在州城北自河州流入又東流入金縣界水經注河水自枹罕赤岍又東洮水注之又東過允吾縣南又東湟水注之又東經金城縣故城北有梁泉注之又東過榆中縣北苑川水注之黃河至金城謂之金城河有馬蓮灘在州西南九十里有

夾河灘二一在州西十五里草木叢雜一在州東
十里可藝五穀又蘇家灘在州東北四十里引河
灌溉甚為民利後漢光和六年金城河水溢出二
十餘里即今州境

洮水 在州南三十里自狄道界北流入河水經注
洮水自狄道會大夏川水又北翼帶三水亂流北
入河

湟水 在州西自西寧大小榆谷東流入境又東與

浩疊河合而注於黃河明一統志湟水在州西一百八十里又金志狄道有浩疊河明一統志源出馬啣山

潤水 在州西北自莊浪流入湟一名澗水明一統志在州西一百九十里

逆水 在州西北自莊浪流入湟水經注潤水自令居南經永登亭西歷黑石谷南流注鄭伯津逆水自廣武城又東經枝陽縣故城南又東南入湟明

一統志湟在今州西一百九十里逆水在今州西二百五十里

筍籬河 在州西南六里北流入河

阿干河 府志在州南三里源出馬銜山自分水嶺分為二派東入金縣為閣門河北入州界阿干峪為阿干河自峽奔流至州城沿河居民多為水磨又謂之水磨河灌地幾百頃北入黃河

浩疊河 在州西一百九十里源出塞北又名閣門

河經燉煌酒泉等郡東流浩亶縣南又東至允吾
縣入湟水又東北入鄭伯津與潤水合又東經允
街縣故城南又東經枝陽逆水注之又東注於金
城河即黃河亶者水流夾山岸深若門也

臯蘭水 在州西南三里

梁泉 在州東白石山下後周將梁暉至此為羣羌
圍迫無水以青羊禱於山神飛泉湧出今呼梁泉
水北流入於河

五眼泉 在州南臯蘭山麓相傳霍去病擊匈奴至此以鞭卓地而泉出飛流瀑布匯流成溪灌溉州南園圃與阿干河並利州志東西四泉俱懸崖飛瀑冠蓋時為游觀園圃賴以灌溉

紅泥泉 在州東南十五里出臯蘭山下五泉東側
甘泉 在州南三十里味甚甘美

獅跑泉 在州西五里傍黃河遇旱取水又名神泉
曲柳泉 在州東三十里其水流為東柳溝北入河

西柳溝 在州西五十里

萬眼泉 在州東北三十里濱河諸山岩間泉湧甚多可資灌溉

蓮花池 在州西七里明肅藩令瀦神泉水為池周數十里花木暢茂魚鱉充牣為遊賞地

龍池 在州西南四十里瓦埠山後

方家泉 在州東南亦資灌溉

金溝 在州南二十里

黃峪溝 在州西三十里出尖山北流入河

東川 在州東廣袤二十餘里沃土平行可耕

西川 在州西廣袤百里川水從七里河水磨溝北
流入河

金縣

駝頂山 在縣南三十里以形似名

龕山 在縣南三十里縣志昔神農採藥於此石上
有古跡宋元豐四年置寨於其上

興隆山 在縣東南十里林麓聳翠奇峰插天一邑

勝境

尖山 在縣南三十里與馬街山相連

馬寒山 在縣西南三十里一名馬啣山盤亘深遠

與狄道蘭州接界炎夏積雪不消

棲雲山仙人洞 在縣南二十五里昔秦致通李致

亨二仙人修煉於此題詩朱跡尚存

豬嘴山 在縣西北四十里金於此置鎮

亂山 在縣東北五十里其山相連數百里峰巒參差亂如列戟黃河經其中

北巒山 俗名百葉山即列戟山

車道嶺 在縣東南七十里接鞏昌府安定界

小龕峽 在縣南二十里兩山相對自南抵北約十里形勢巉巖

大峽 在縣西南十里浩亶神濟二河自此分流夾城南曰浩亶北曰神濟

白草原 在縣南二十里草地廣濶俗謂之百草原
黃石坪 在縣南四十五里

黃猴洞 在縣南三十里

千佛洞 在縣南四十里洞中繪佛千餘

煤洞 在縣西北四十里居民利賴之

黃河 在縣北六十里自蘭州石嶮峽東北入金縣
亂山二百餘里始瀉落巨川如瀑布然土人沿山
引水溉田甚多

浩亶水 通志在縣南門外源出馬寒山一名閤門

水東流入黃河有閤門河橋在縣南門外

苑川水 在縣東十五里通志源出馬寒山東流與

浩亶水合

小龕水 在縣南十五里通志源出龕山東流與浩

亶水合

二十八渡水 在縣東水經注出勇士縣南山東北

流溪澗濼曲途出其中經二十八渡因名又北經

其縣而下注於河

清水河 在縣東北三十五里

卧龍川 在縣西三十里

金縣川 在縣東南七十里

溫泉二 一在縣西十里 一在縣東十五里

簞眼泉 在縣西北六十里

萬眼泉 在縣北五十里

河州

鳳凰山 在州東十二里通志形如鳳凰古號河州
為鳳林郡以此

積石山 府志禹貢導河自積石至龍門兩山如削
河流經其中外臨番界金城要地俗所謂小積石
也在州西北百二十里括地志大積石山在吐谷
渾中隋立河源郡命刺史劉權鎮之唐李靖伐吐
蕃經積石行二千餘里宋元立積石州明洪武改
為關上有神禹廟又山海經積石之山其下有石

門河水冒以西南流吐蕃傳武后時論欽陵謂郭
元振曰甘涼距積石道二千里按積石本在徼外
自唐以靜遠城置積石軍始移其名於內地

唐述山 在州西北水經注黃河北有層山山甚靈
秀山峰之上立石數百丈亭亭傑豎競勢爭高其
下層岩峭舉壁岼無階中多石室室中若有積卷
而世士罕有津逮者因謂之積書巖巖堂之內每
見神人往還俗人不悟其仙乃謂之神鬼彼羌目

鬼曰唐述因名為唐述山指其堂密之居謂之唐述窟下有水南注河謂之唐述水元和志積石山一名唐述山今名小積石山括地志在枹罕縣西北七十里

雞窠山 在州西北一百四十里屹立霄漢

梨子山 在州東五十里多有酸梨其東即洮河渡
金劍山 在州東南隋志大夏縣有金鈕山元和志
金劍山在大夏縣二十里蓋即金鈕山也

紅山 在州南十里

牛脊山 在州南二十里以形似名

喬家山 在州南六十里

雪山 在州西南一百五十里通志接洮州番界四

時積雪石如露骨一名露骨山宋熙寧六年木征

據河州王韶克之穿露骨山南入洮州境山徑陡

峻狹隘釋馬徒行

白石山 在州西南應劭曰白石縣有白石山在東

水經注灑水經白石山北即今雪山也

石門山 在州西北二十里舊鳳林縣

鳳林山 在州北三十五里五巒俱峙相傳昔有鳳鳥飛遊於此故名秦州記曰枹罕縣有鳳林山川中則河水東流隋志枹罕縣有鳳林山

冰壺山 在州北六十里

驚驄嶺 在州南五十里御史熊爵建坊

焦紅嶺 在州西北一百里路通西寧

分水嶺 在州北二百里黃河外接西寧界番部所
出沒

黑茨嶺 在州北九十里

當川坡 在州東南一百六十五里路通臨洮

安遠坡 在州東南四十里驛路所通

廣大坡 在州西北二里州志在枹罕縣西北罕井
在焉昔吐谷渾創居於此一名廣大原四望寬平

居民稠密東西相距八十里南北相距四十里又

名萬頃原昔時番漢所駐牧地也又萬頃原上有
原周圍百里謂之重臺原

他刺坪 在州北百里黃河外接莊浪界

榆谷 在州西建武中滇良擊破先零奪居大小榆
谷地章和元年迷吾復據大小榆谷侵擾河湟鄧
訓發兵擊之乃去後漢永元十四年隗麋相曹鳳
上言西羌為寇常居大小榆谷土地肥美有西海
魚鹽之利北阻大河以為固緣山濱水可廣田畜

請及時規固二榆屯田積穀隔塞羌夷交關之路
從之大小榆谷即唐之九曲去積石軍三百里

葵谷 在州東晉太和二年涼主張天錫擊叛將李儼於隴西別將掌據敗李儼兵於葵谷即此

松明巖 在州西一百里林木葱秀峰巒聳翠遇旱
禱雨於此

黃河 州志禹貢曰導河自積石至龍門九域志州
北州西北至黃河皆四十里元志黃河自歸德州

又四五日至積石州即禹貢積石又五日至河州
安鄉關又東北行一日合洮河又一日至蘭州明
一統志黃河上渡直州西北一百二十里之積石
關路通西寧謂之積石渡黃河下渡直州東北六
十里之刺麻川路通莊浪謂之刺麻川渡

大夏河 通志在州南三里一名白水河東北流入
狄道界入洮水按大夏河去州五里源出關外由
土門槐樹老鴉三關入境經州南折北流入河有

大夏橋在州西三里跨水上

洮河 河東屬狄道界河西屬本州界形勝曰東繞

洮河

銀川河 在州西北六十里

樣卑河 在州北一百里

灘水 在州南漢地理志云白石縣有灘水出西塞

外東至枹罕入河水經注水自塞外羌中出東北

經榆城東榆水注之又東北經石門至臯蘭山水

左右翼注之又東白石山水注之又東北羅溪注之又東北故城川水注之又東北出峽北注於河元和志水在鳳林縣西明一統志訛為大夏河

牛脊河 在州南二十里

洪水河 在州南門外二里

廣通河 在州東南六十里寧河城東俱合大夏河入於黃河

槐樹關河 在州西南六十里

老鴉關河 在州西南六十里

把撒川 歸德守禦千戶所去州六百里西番出沒之處

俺哥川 在州北五十里黃河外土膏腴五穀茂盛

胖哥川 在州東北八十里黃河外

困子溝 在州東二十里又名洞子溝洩水支流深數十丈長二十里路通蘭州

大通河 在州東北八十里

銀川 在州西六十里續綱目宋治平元年瞎孛二子長曰木征居河州少曰瞎吳叱居銀川有衆數

萬內附

撒刺川 在州西積石關外二百里番回五族土官所居

刺麻川 在州北五十里

馬廠溝 在州北九十里

河夾岍 在州東北水經注云河水經赤岍北即河

夾岍也秦州記曰枹罕有河夾岍廣四十丈義熙中乞伏於此河上作飛橋高五十丈三年乃就

顯神池 在州西北積石關西八十里周圍三十里萬木森列向著靈異土人稱為顯神池

龍湫 在州西北六十里遇旱祈雨即應即湫池也又州東三十里有淺湖橋相傳上古時州地皆湖禹疏鑿入於河湖始為陸今州東十里有摺橋開鑿之迹猶存

九眼泉 在州東十里泉有九竅

河州川 在州東東西二里南北十五里即舊湖地

云

歸德所

東山 在城東三十里

郭兔山 在城東二十里與東山相連

郎纏山 在城西一百里番夷雜處之地

八洳山 在城西十里黃河經其下

哈兒澗山 在城北一里亦黃河經流

黃河 在城北一里

三岔河 在城東三里自巴撒川三岔塘果喇溝山

硤流入黃河

羔楞河 在城西四里自西南扎哈兒山硤流入黃

河

熱水泉 在城西南三十里八加山水自地湧出性

如沸湯故名

龍王池 在城南一百里地名都受在叢山之中
鞏昌府

隴西縣

赤山 在縣東十里山色正赤渭水經其下

樺林山 在縣東南四十里峯巒秀拔多產樺木

仁壽山 在縣南一里自漳縣來綿延百餘里其石
為盤龍山

鎖峪山 在縣南五里下為烽火臺有馮將軍遺壘

翠屏山 在縣南四十二里五峯錯列郡之案山也
西秦乞伏國仁襲鮮卑三部於此

藥鋪山 在縣南六十里山多藥草與漳縣分界

布雲山 在縣西南五十里一名黃石坪與月岩山
相接

石門山 在縣西南八十里兩峰相對如門又五里
曰翠峰山在縣西南六十里上有黑池

八角山 在縣西北九十里峻峭崕岬有八角又有

懸溜從石崖飛灑一奇觀也

蓮峰山 在縣西南九十里四圍石崖峭險有五峯亦名西五臺俗名馬鹿山岩壑峻險古松參天為郡城勝境其傍有老君山有二仙洞壁立千仞

首陽山 在縣西南一百里其上有關府志相傳夷齊採薇處麓有二聖墓墓傍有祠其左有露骨山
高峰峻絕盛暑積雪

薄寒山 在縣西南唐會昌四年吐蕃將論恐熱攻

鄆州為鎮將尚婢婢所敗走保薄寒山山近岷州境

三岳山 在縣西七里俗名安家山脉自岷嶺來其上寬平可耕山腹有三巨石參列如品字又謂之三品石二河交會其前縣之主山也山麓有岐路西北通臨洮西南通岷洮

將軍峪 在縣西北四十里宋名將王德故址今墓存

安都山 在縣北上有堡甚險

桃花山 在縣東北三十里色紅潤如桃花有魯班

峽蟒洞深不可測

赤亭山 在府西二十里赤亭水出焉昔姚弋仲居
此

宋板坡 在縣南三十里粟水出此

河浦坡 在縣北一里渭水之陽蘭靜通衢

白土坡 在縣東北三里通通渭馬營路

渭河 在縣北一里自臨洮府渭源縣流入境又東
歷通渭寧遠伏羌縣界入秦州境府志渭水入城
分東西南北四池前後濬引以資汲取宋熙寧八
年秦鳳提點鄭民憲自通遠軍道渭河至軍溉田
又有頭渠在縣西十五里二渠在縣西教場三渠
在縣西三里岳家墩皆引渭水澆圃轉磨下流仍
入渭

廣陽河 源出府西九十里之西山二源合注東北

流遶縣西一里注於渭

科羊河 在縣西二十五里東北入渭明萬厯間開
永利渠引科羊河水入府城以資汲取至今為民
利

荊頭川水 在縣南一里源出荊谷經鎮峪之烽火
臺下北流入于渭

赤亭水 在縣東北亦名赤水經獮道城北南入渭
水

武城川 在縣西九十里源出鹿部西山東北入於

渭

粟水 在縣東南出宋板坡由南門引入城以給民
用

六泉 在縣東南五里西秦乞伏國仁破鮮卑於此
泉源有六故名

西泉 在縣西一里味甚甘美冬夏不涸

靈湫池 在縣東南三十里

聖母池 在縣西南五十里禱雨即應

安定縣

照城山 在縣東五里與西巖山脉皆自馬苑來又
東有鳳凰山亦名照城山二山對峙邑中諸山之
綱紀也又有興雲山照城山之支阜

溫泉山 在縣東南七十里其山雄峻溫泉出焉
南安山 在縣南一里山脉自岷洮來

西巖山 在縣西二里與鳳凰山對

亂山 在縣北八十里接金縣界其山形錯出稠疊
難狀

雙峪嶺 在縣南四十五里

胡麻嶺 在縣西八十里接臨洮府金縣界甘河水
出焉相傳張騫自西域還種胡麻於此因名

車道嶺 在縣西北六十五里接金縣界亦曰車道
峴明初徐達敗王保保於此

青嵐峪 在縣東三十里山多嵐氣

錦雞原 在縣西四十里

東河 在縣東源出麻子川北流遶城東北合西河
入會寧縣界

西河 在縣西源出甸子川東北流遶城西又東會
於東河東河味苦西河味甘

甸子川 在縣西四十里土物阜盛商賈叢集明肅
府置內官營於此

得羅川 在縣西南二十里田約千畝土脉肥饒

關川 在縣北八十里西通蘭州北通靖遠俱入黃

河

煖河 在縣西五十里隆冬不冰俗名橫河

雙泉 在縣東南四十里一邑之水惟此獨甘

溫泉 在縣東南三十里從山石間湧出如沸浴之

可愈疾俗名王家泉

通渭縣

東山 在縣東五里俗名峽口山

斗底山 在縣東八十里形如覆斗

秦仙山 在縣東五十里石峯高峻下有仙洞洞前有獨木橋入罕過者唐有秦仙修煉於此

屏風山 在縣南二里

衙頭山 在縣南十五里有元總帥汪世顯行臺遺跡

發雲山 在縣西南二里山高峻可瞰城市

十八盤山 在縣西南五十里徑險仄凡十八盤始

得至頂為縣境控扼之處

筆架山 在縣西北一里山自平涼府來綿亘百餘里有五峯峙城北縣之主山也即照城山

玉狼山 在縣東北三十里元時有白狼遊此

煉銅坪 在縣南六十里其上產煤

尖崗山 在縣西六十里有孫真人塚

蘭家碛 在縣南八十里有四渡水行人苦之

渭水 在城北自隴西縣流入境又折而東南入寧

遠縣界

西河 在縣西二里源發華川南流入于渭

華川 在縣西七十里接隴西界其川四圍平坦水草清茂明苑馬寺芻牧地

東河 在縣東二里源出筆架山流逕縣南入西河
又北河在東五里又東十五里為中川水又東三十里為海子水俱南流入西河

緝水河 在縣西七里舊引水入城由西北出灌溉

取汲民賴其利又西二十里為錦鷄峽水又南十里有龍尾溝水俱資灌溉

悠江 在縣北五十里形如半月月夜臨之水天一色

靈湫池 在縣西北十五里中林山太白祠下懸石如白水從中出取以祈雨輒應

九眼泉 在縣東南七十里其出九孔狀若聚星
溫泉 在縣西南十五里隆冬若沸浴之可已病

海子川 在縣東北三十里其水匯為潭如海子然

漳縣

箭筈山 在縣東南四十里山有兩峰高險插天因

名

南山 在縣南五里一名汪古山上有汪總帥墓

三岔山 在縣西三十里東連縣境西抵洮岷北接

秦隴故名

鳳凰山 在縣西北五里山下有泉有橋跨漳河西

接露骨山

西傾山 在縣西北七十里山跨隴蜀界番漢俯洮
岷郡邑諸山多其支阜積雪不消俗名露骨山即
隴西之小雪山西傾山在洮州此山同名

馬舖山 在縣西北十里四圍石崖居民避兵處

烟波山 在縣西北五十里與三岔山相連下有紅
崖洞

藥舖山 在縣北八里其上產藥

青霧山 在縣東南三十里峯巒聳翠林木蒼蔚與
寧遠縣之斗底山相連

文峯山 在縣南五里亦名三台山三峯如筆架

獨秀峯 在縣西南三十五里一石突起平地峙於
漳濱翠秀如畫

漳河 在縣南二里源出岷州東木寨嶺東流經縣
南又東北至寧遠界合廣吳河入渭

鹽廩河 在縣西南五里源出十八盤山東北流入

於漳

小鹽井河

在縣南三里源出鷹架山東北流入漳

河宋鹽川寨得名以此

溫泉

在縣西二十里泉蒸有孔望之若星

鹽井

在縣西南五里水澄清熬之成鹽

會寧縣

鴉岔山

在縣東二里自雪山來縣之主山

桃花山

在縣東南三里其山脉自靜寧州六盤山

來映日如桃花因名傍有神泉前有黑池其支麓
為式虎山

式虎山 在縣南七里

牧馬原山 在縣西二里其上平廣週百餘里形圓
如餅明太僕寺牧馬之地又名蒸餅山

古堆平山 在鴉岔山右五峯森列參差雲表

鐵木山 在縣西北百里山色如鐵又十八盤山九
泉出焉

龍頭山 在縣北二里下有元式水遶城北

紫微山 在縣北五里有稍岔水出焉

紅山 在縣北九十里山形壁立上有五洞

烏蘭山 在縣北二百里下有烏蘭關

雪山 在縣北三百七十里盛夏積雪峯如玉山

屈吳山 在縣東北百里峯巒森聳多產獐鹿居民

射獵於此

白玉峯 在縣南十里產五色土可資藻績又有青

玉峯

華家嶺 在縣東南一百里路通郡城又小嶺在縣南四十里為達府小路

硝崖 在縣北百里產芒硝其土赤粉青

小白草原 在縣北二百二十里又東北有大白草原平曠肥饒多白草

沙石原 在縣北四十里周四十里

峨峒峪 在縣南十里又有車輪峪在北十里迤遞

峪在北九十里湟麥峪在東三十里索托峪在南
八十里

南河 在縣南二里源出保川諸澗流經式虎山苦
水注之經縣西南又北經郭城驛入祖厲河又北
經靖遠衛入於黃河

黃河 在縣北二百七十里其河自金城經縣界入
靖遠縣

什字河 在縣東北二十里源出隆德之隱山谷中

入十字川因名又北入床岔河

南峪川 在縣南三十里地頗腴古城川在縣南二十五里後川在縣東十里大川在縣北五十五里周八十里紅崖川在縣北一百四十里二川三川五川十字川俱在縣東北志云縣境之水悉北流經靖遠境入於大河

響水 在縣東一百里水出懸崖下潺急觸石聲聞數里北流入於黃河

松樹岔河

在縣東三十里東流合於響河

米家峽河

在縣南五里源出蒸餅山北流入於黃

河

黑龍湫

在縣西南四十里俗傳中有黑龍禱雨多

應

紅柳泉

在縣北二百里可以沃田

懷戎泉

在縣北四百二十里出懷戎堡為池為渠

可以沃又有法泉亦可沃

天泉 在縣北五十里其泉大湧隆冬不冰

伏羌縣

鼉山 在縣東二十里山形如鼉渭水經其下

天門山 在縣南里許縣之主山三峰聳峙有兩穴如門中有湫池

朱圉山 在縣西南二十里即禹貢所載之朱圉也俗呼白岩山

錦鏡山 在縣西三十里朱圉之支峰有一石如鏡

色鮮赤映日如錦故名

大像山 在縣西南三里石崖有大佛像長八丈宋嘉祐四年鑿上覆以樓左側有洞有閣道可登上有隗囂歇涼亭

麥塚山 在縣西二十五里與朱圉山相連形若麥塚渭水經其下暴漲則阻行旅懸崖設棧道以便行人明知縣趙守成命匠鑿山通道始免水患

木梅山 在縣西二十里南倚朱圉北臨渭水

狐盤谷 在縣東即漢叛羌敗漢陽長史蓋歟處

三都谷 在縣西宋知秦州曹瑋敗西番於此

大將山 在縣西南六里山下石形似人高五十尺

如大將然故名

無畏山 在縣西五十里高險竒秀突出雲霄其巔
雲飛即兆雨中有靈泉

石鼓山 在縣南四十里有石長丈三尺廣厚如之
其形如鼓不擊自鳴鳴則兵起

石臼山 在縣南八十里昔有人就此舂藥後人至此者若無意履之其臼即響有心則無聲

緹羣山 在縣北五里平巒疊翠勢若旗鼓昔漢通西域以緹騎三千憇此見後漢書

渭河 在縣北一里自寧遠縣流入邑北東流入秦安縣境縣西有陸田通濟廣濟惠民四渠皆引渭水之流溉田數十里

永寧河 在縣西四十里源出南山北流入渭

落門河 在縣西五十里源出落門山北流入渭即
來歛破隗純處

半博水 在縣西南源出半博山谷中北流入渭又
天門水出天門山東流入渭

散渡河 在縣東北五里即通渭之西河合中川水
經十八盤山至縣境南流入於渭

藉水 在縣南源出西山百澗齊流總成一川東流
入秦州界

龍馬泉 源出縣西北平地下渥洼沙作龍馬之狀
相傳每春夜放牝馬飲此泉自能生駒

寧遠縣

翠屏山 在城內學宮前為學宮之屏

老君山 在縣南五十步屹然聳峙縣之案山俗名
南山山脉自岷州來上有湫池仙洞

斗底山 在縣西南七十里狀如覆斗上有堡可以
避兵與漳縣青霧山相接

董墨山 在縣南三十里中有湫池水黑如墨故名
太陽山 在縣南一百二十里有隘可守曰太陽山
口在禮縣界產鐵舊置鐵冶於此

瓜牛山 在縣西南二十里高五百餘丈周圍四里
上有日月空日月未出其光先照

箭杆山 在縣西南四十里以山峰挺峙而名上有
石洞高深可以避兵下有馬務鎮

栢林山 在縣西南六十里內有水泉流通又十里

有水箕山高二百餘丈皆古避兵之所

武城山 在縣西南三國魏鄧艾拒姜維於此武城

古縣名山以此名

九龍山 在縣西北二十里為邑名山

魯班山 在縣北四十里上有洞俗傳魯班鑿此名

魯班洞山下又有大佛峽

石門山 在縣東北五十里四圍皆峽中有一門險

峻可以避兵下有洞光映如月名夜月洞

分水嶺 在縣東南九十里與禮接界

桃花山 在縣北二十五里中有溪又名桃花峽有

石似玉

研石峽 在縣南四十里又東南為木林峽

銀觀峪 在縣南三十里舊有銀礦鐵冶酒井鹽池

渭河 在城北自隴西沙灣入縣境東北至伏羌界

縣西路有十四渠東路有十三渠皆引渭溉田民

賴其利

廣吳河 在縣西三十里自漳縣東北入境至折羊口與漳水合又東北入渭

山丹河 在縣西十五里源出岷州城兒谷東北流經山丹川因名山丹河又經灘閣川東北流入渭
馬成龍川 在縣西南七十里源出鹿部西山東北流注武城

南峪河 在縣東三十里自禮縣大木樹關流為楊家河經落門入渭

古靈泉二一在縣東一里山石中瀉出為瀉泉一

在縣西南百步平地湧出為湧泉俱資灌溉北注

於渭

溫泉二俱在東南五十里之內其一即南峪河也

龍頭泉在縣東北三十里狀如龍頭泉流三派可

溉民田

八海泉在縣東四十里常滿不溢又東北有龍泉

亦名霧罩泉

西和縣

豐臺山 在縣東二里帶水環山松竹蒼鬱黑峪水

經其下

太祖山 在縣東南山岩聳秀下瞰數州歷歷可辨

橫嶺山 在縣南三十里其山連十八盤下有橫嶺

水

祁山 在縣西北七十五里其上有城諸葛亮伐魏

攻圍祁山魏司馬懿救祁山亮糧盡退軍張郃追

至青封被殺城南有諸葛故壘山高巖險天下奇
峻為隴右襟要

寶泉山 在縣北二十里其峭如劍背有泉不盈不
涸旱禱輒應唐寶應間吐蕃陷天水邑人保聚於
此

鷄峯山 在縣東北十五里連塔山山形如圭亦名
圭峯山

獨頭嶺 在縣南宋將李好義大敗金兵遂復西和

處

塞峽 在縣東宋將魯尚期逐楊難當至此左側有石穴洞人言潜通下辨云

清崖峽 在縣東北五十里

屏風峽 在縣西北四十里宋郭思作祁山神廟碑以此峽為正祁山

朝陽觀山 在縣東一里嶺有泉清見底煮茗味甘
雲霧山 在縣東南二十里霧鎖雲橫嵐氣逼人

西高山 在縣東南百里山盡可田民居盤旋

通靈山 在縣東南百里有清泉自岩竇飛落

塔子山 在縣東北二十里孤峻插天

卧龍立龍崖 在縣南五十里道傍鱗甲踪跡宛然

八佛崖 在縣南七十里峭壁危峯

飛龍峽 在仇池山下氏人楊飛龍據此唐杜甫寓

焉

神魚洞 在仇池山下每年清明前後魚自洞連貫

而出居民取之杜詩神魚人不見即此

千佛洞 在縣南五十里岩嵌壁立磴道險仄洞口

一泓瀑布輕雲時覆

西漢江 在縣西北七十里源出嵯冢山自秦州舊

天水縣界流入西南經祁山城南流入成縣

鹽官水 在縣北九十里自秦州界流入東南入漢

水經注在嵯冢西五十里許相傳營煮味與海鹽

同

橫水河 在縣南二里源出橫嶺經縣東北合鹽官河入漢

白水江 在縣北二里從西番界東流經階州城南二里過縣入蜀合嘉陵江

濁水 在邑境從長道縣界穿大潭舊鎮合清水入階州

鹽井 在縣東北六十里煮水成鹽民資其利

九龍泉 在長道鎮西三里四時湛清夏涼冬溫可

引以灌溉

煖泉 出豐臺山下今名湯峪

靖遠縣

紅山 在縣東十五里石崖有泉曰法泉禱雨多應
屈吳山 在縣東七十里古懷戎堡南岩壑多泉林
密獸多資人獵取南接六盤山西連大白草原上
有顯聖廟可祈雨

烏蘭山 在縣西南一百二十里南接崆峒東連屈

吳唐置烏蘭縣舊有烏蘭關

紅嘴山 在縣西北五里山半有懸厓左黃河右祖厲二水交流其下上置斥堠眺望河北安會實要隘也

雪山 在縣北一百二十里西距黃河南接分水嶺松栢叢茂山勢高峻積雪不消

尖山 在縣北一百三十里孤峯高峻岩壑多泉叢林茂樹

韋精山 在縣北一百三十里西連雪山東臨黃河
河水自上垂流數十丈轉折而東入寧夏界

腰玉山 在城南里許山勢崧岷聳拔每天將明有
白氣環繞山半日出方散故名

安神山 在縣北三十里南接法泉東接屈吳北連
崩圍下多泉源可以灌溉

分水嶺山 在縣北一百里西距黃河北接雪山水
分南北素稱天險

神木山 在縣東九十里山多茂林澗多甘泉

崩團山 在縣東北九十里山下多泉又七里青石
厓下有泉曰渦子水相傳其地每黎明時晴嵐曉
障若城郭重樓女牆煥然可觀日出則沒

寶積山 在縣東北一百一十里下有泉水出石炭
產鐵後有大小石溝產金東北接崩團山

松山 在永安堡東南十里山多松柏多泉水嘉木
地亦肥饒

金山 在平灘堡西五里上有聖母祠祈雨有應

黃河 在城北一里其間山峽險隘垂流直下高數
十丈自蘭州金縣經平灘堡流入東北至蘆溝堡
入寧夏中衛界河北即為塞外

祖厲河 在縣西五里源出舊祖厲縣南山下北逕
會寧縣入大河一名苦水河

麥田水 在縣北源出麥田城西北西南流注於河
裴家川 在縣東北一百三十里自莊浪衛流入明

嘉靖中舊有臺堡相接以斷北寇西行之路

鎖黃川 在縣東北一百八十里明時套寇每由此

入犯

法泉水 在縣東十五里懸崖滴泉清澈甘冽

紅柳泉 在縣北三十里又北七十里萬馬泉皆可

沃

河池 在縣東一百二十里其地春夏因雨水生鹽
雨多鹽少雨少鹽多遠望似河故名河池舊志乾

鹽川即此

東泉 在打刺赤壁東二里清冽可灌田西泉亦清
冽近鹽池入池亦能生鹽

岷州

東山 在城東二里疊水經其下北流入於洮

冷落山 在州東五十里山形孤聳盛夏陰晦即雨
雪故名

遮陽山 在州東北一百二十里山臨官道以日影

為山所蔽故名其右為夸門山

貴清山 在州東一百五十里頂平行可耕種

岷山 在城北江水所出洮水經其下土色純黑四時有雪不生草木其西麓接四川界

金童山 在城南半里下瞰城市

崆峒山 在州東十里

鞏鞏山 在州東北七十五里明置寨於此為岷鞏

之衝要俗名木寨嶺

分水嶺 在州東南四十里山南為岷山即大禹導
江處山北入疊藏河

西山 在州西二十五里上有五臺寺觀音湫禱雨
輒應

隱賢山 在州南一百里舊有三閣昔姚太師結庵
讀書於此

摩雲嶺 在州東南一百五十里下臨江水宋有臨
江砦

穿山洞 在州東北一百三十里其洞自山東穿石
而入約二里許至山西而出中有溪水流出土人
以木板覆其上遂為入山通徑人行洞中木上水
在木下石勢巉巖水聲潺潺洞西為鞏岷通衢洞
東為一大川土沃民庶彷彿桃源境界俗名朱古
洞

洮河 在州北一里由洮州衛東北流至此又東北
流入臨洮府界北入黃河

岷江 在州東南四十里分水嶺下南流為岷江由階文入四川界

疊藏河 在州東一里源出古疊州番境經城東而北流入洮河即禹貢桓水

荔川河 在州東南九十里宋有荔川寨以此名

遮陽河 在州東南九十里源出氍氍山東至遮陽會金溝河至三岔為漳河上源

閭井河 在州東一百四十里源出莫遮攔山流入

馬淳河東北入漳

臨江河 在州南一百四十里源出吐谷渾至西固
入白水江

良恭河 在城南二百八十里宋有良恭鎮故名俱
南流入岷江

西川 在城南洮水之南延袤五十里土脉肥饒居
民耕植

南川 在城南疊藏河西岸地可樹藝

靈泉 在州北一里可禱雨布和天泉在西郭又卧龍泉在西南五里平泉在東二十里

金紫池 在城東一百二十里州人禱雨處又金龍池廟坪池白龍池俱在東黑松澤池在城南二十五里

千丈潭 在州東北一百二十里遮陽山之西南三丰井 在城西北角仙人張三丰寓楊氏宅所掘以栢木為底後建祠於井北繪像祀之

洮州衛

邊外山
水附內

葫蘆山 在城中以形似故名

鳳凰山 半在城外半在城中有五峯中若伸頸傍若舒翼故以形得名

東隴山 在衛東南一里明沐英討叛番築城於山之南川

石門山 在衛西南六十里兩峯壁立中闕一門山南即古壘州之地

石嶺山 在衛西北十里山勢峭拔多林木唐置石嶺關於此

玉笋山 在衛西北五里山皆白石最中上挺一石宛如玉笋登之可望數百里

黑松嶺 在衛東北三十里土黑而多松

石峽山 在衛東北五十里兩峽中洮河流焉俗名石門口

觀音洞 在衛東北五十里洞之中頂滴水如磬聲

其下一圓石承之水滴上浮而旁無溢泛每冬結
為冰柱歲旱祈禱多應

蓮花山 在衛北七十里山形似蓮

九條嶺 在衛西一百里地當險要有丹巴川為蕃
部之路

西傾山 在衛西南三百五十里又名強臺山延袤
千里外跨諸羌內連列郡洮水出焉為西南之祖
山

素嶺山 在衛西南番界即西傾傍支春夏常多積雪

石鏡山 在衛西南番界山石皎潔可鑑形體故名
中有銅窟隋代常采鑄之

南河 在南門外源出石嶺山經衛南入洮

洮河 在衛南三十里源出西傾山之東即羶臺山
東北流經吐谷渾中三百里至衛城南又東流至
野狐橋入岷州界又東流至岷州東境北流折而

復西至本衛境又東北流過臨洮狄道而入大河
其流湍急每冬不及凍結珠蔽河而下故謂洮河
流珠

羊撒河 在衛北六十里又六十里有冶木河

常山池 在衛北一百二十里池夾兩山中盤蜒十
餘里值冬冰凍平合不溢

黃河 在衛西九百里番界東北流入河州界

莫河川 在西傾山北晉義熙初吐谷渾為乞伏乾

歸所敗其王大孩走死樹洛干嗣立帥衆奔此川
沙澗諸戎悉附之

朶的河 在衛西三百里源出朶的番族南流入洮
河

納憐河 在衛西七百里哈藏族西北流入黃河舊
志有野厖河源出西傾山北流五百餘里入黃河
墊江 在衛西南番界一名羌水一名白水江源出
西傾山南一曰西強山東流逕仇池出宕渠至巴

郡入江

藥水 在衛西南番境源出古合川縣東北平地有
患冷者煎水服之立愈

度周川 在西番界晉隆安二年乞伏乾歸弟益州
敗吐谷渾王視熊於此川

長柳川 在西番界晉義熙九年乞伏熾磐擊吐谷
渾支旁于長柳川又擊破別部於泣勒川又十三
年熾磐遣其子安樂擊破樹洛干之弟阿子于于

堯扞川二川俱在衛西南

西固城

東山 在城東五里地土寬平里民多居其上固人

田庄大半在焉路通階文

筆架山 在城南二里接悉界

武都山 在城西二十里山高峻為一方巨膽

孔函谷 在城南姜維欲斷魏軍後自沓中從此谷

入北道

仙人山 在城東三十里昔有馬仙人尸解於此故名

朝陽山 在城西三十里

翠峰山 在城北十里極聳耳峻

天門山 在城北二十里四時積雪不生草木值旱入穴取水祈雨多應

露骨山 在城北三十里亦曰雪山積雪不消東連階文北極河洮宋王韶穿露骨山道隘險釋馬而

行即此

魯班崖 在城北九十里兩崖懸絕有二靈柯插入
岩隙間以棧覆土以通往來

中流底柱石 在城南二十里紫水江中其石巉峻
波浪衝激非人所到

白水江 在城南自岷州界東南流入階州亦名羌
水

岷江 在城東四十里源發分水嶺南流入四川界

三眼泉 在城北三里於石厓孔中湧出衝激浩瀚
穿城而過有水門二入白水江近城田土賴此灌
溉

南麓飛泉 在城南五里懸厓瀑布如千尺白練灑
空而下

平涼府

平涼縣

崆峒山 在府西三十里一名笄頭山廣成子學道

崆峒山黃帝西至山問道上有問道宮絕頂有香
山有廣成子洞峯之最高者為翠屏峰山有圓石
累累如珠者名垂珠峯巨石上平下銳者名香爐
峯有峯如柱當路直立者名蠟燭峯層崖邃密踞
絕岩間者名雷神峯巨石橫亘兩峯之間名仙人
橋有石棋盤名仙人弈處東臺下有巖洞名皂鶴
洞又有青龍洞雨後將晴雲輒歸洞中亦謂之歸
雲洞山之西北為望駕山下有撒寶岩西岩有泉

又有琉璃泉俱甘

筭頭山 在縣西四十里以形名涇水所出黃帝西
至於崆峒登筭頭與崆峒山連

翠屏山 在縣南一里

銅城山 在縣南震宇記在潘原縣西南三十里

壽星山 在縣南六十里

石馬山 在縣東南二十里北麓抵涇川有水入之

東與馬嶺山對峙而最高者為箭括嶺子山

可藍山 在縣西南二十里元和志一名都廬山十
六國春秋赫赫連定勝光二年敗於陰槃登岢藍山
屯兵于此寰宇記可藍山亦涇水源與笄頭山連
亘又為分水嶺山

大統山 在縣西南二十里與可藍山相接

天壇山 在縣北五里一名卧虎山下有全真洞元
道士賀志貞所居其西為會盟壇唐貞元三年吐
蕃詐請盟因築壇于此使渾瑊與吐蕃會盟被劫

處也

馬屯山 在縣西晉太元十九年苻登奔平涼收集遺衆入山姚興率衆攻之其山南北二十里東西三十里

雕窠峽 在縣南三十里兩山深險為羣雕出入往來之路因名馬嶺石馬之水道流入于涇

金佛峽 在縣西六十里峽長二十里峭壁層峙不見天日中有金裝佛明嘉靖十九年於峽口築城

復建潰水紅沙二石墩于山上以增戍守為河西險要

彈箏峽 在縣西一百里涇水南流經都盧山中風吹流水常如彈箏之聲行旅因謂之彈箏峽魏宇文泰在夏州馳赴平涼令杜朔周先據此唐突厥入犯詔李藝屯華亭及此峽以備之建中三年鳳翔隴右節度與吐蕃盟以涇州西至彈箏峽為唐界貞元七年劉昌城平涼開地三百里扼峽口

孫丘谷 在縣東南晉苻秦平涼太守金熙與姚秦
將姚方成戰於此敗之又甲積谷在東南二十里
苟頭原 在縣東晉時苻登自平涼進據此逼姚萇
於安定又有葉平原在縣東南十里自原而東五
十里以暨涇州之回中皆謂之南山其水皆北流
入涇又虎山西二十里曰杏原又虎山北十里有
小蘆河原又北十里曰大蘆河原又北十里曰淺
澗原佛堂原在縣北三十里草峰原在縣東北五

十里卓村原在縣東北二十里以上諸原皆平曠
可耕植

涇河 在縣西北筭頭山發源有二支南支出崆峒
峽中曰前峽北支出老山曰後峽合流至府城西
北一里疏為渠以分流溉田東入涇州界

橫河 在縣西五十里源出華亭縣與湫峪諸水俱
入涇

清水河 在縣東五里成化末疏為利民渠凡南來

水咸滙之以溉民田

太平水 在縣東郭舊志源出小谷亦曰後谷谷高
數丈縣南諸山泉流滙焉三十里許北折入涇東
西溉田各里許明嘉靖六年水暴漲漂沒東郭溺
居民又東二里曰岨谷東西山泉所滙流八里入
涇暴水視後稍減自此以東南北山谷之水咸入
涇民以利灌溉多負水以居

湫峪水 在縣東三里源出翠屏山又大岔水在府

東南十里源出壽星山皆北流入涇水

潘谷水 在縣東震宇記在潘原縣東三十里流入涇

柳湖 在縣北三十里湖畔柳數千株

胡盧水 在縣西源出鎮原縣頽沙山下流入涇本
名蔚茹水唐志白草軍在蔚茹之西即此

湫池 在縣東北五十里其水四時常溢旱禱有應
蘇林曰湫淵在安定朝那縣方四十里停水不流
冬夏不增不減不生草木

暖泉 在縣北二里其水湧出四時溫然潭深數尋
蒲荷甚盛東流溉田三里

崇信縣

錦屏山 在縣治南城據其麓上列雉堞繁花木三
時絢爛如屏然一曰花山

閉銀山 在縣南赤城右山特峻拔

五馬山 在縣西南四十里狀如五馬故名

玉京山 在縣西南九十里

烽臺山 在縣西五里山最高盤折數十層始至其頂昔時烽堠之所今為砦可備兵

斷萬山 在縣西四十里險絕難登與武安監接壤其左有三姑山

文筆山 在縣西四十里峽口北岸奇峯秀削狀若芙蓉

五龍山 在縣西四十里距峽口之陽峰嶺蜿蜒林木蒼鬱相傳為唐時禦戎故壘

鳳山 在縣北三十里形如鳳翥巔作柱石峯與文
壁映其下為芮谷懸飛泉南流入汭

迎駕坡 在縣西南三十里昔太王遊畋至此居民
簞食壺漿以迎之

箭筈山 在縣赤城南

文壁峯 在縣東三里巔高四丈五尺

唐毛山 在縣境自唐林木叢生如毛可以取材故
名

峽口 在縣西北四十里神禹疏鑿故跡兩崖峻削
羣峯巒岼泐水自華亭南北二源合流出此雪浪
噴湧每瞻風雨望雲物昔為西戎咽喉要地唐人
屯兵塞險有勒石遺跡

拽兵原 在縣北唐李元諒破吐蕃兵於此故名

泐水 在縣北八十步縣西北四十里有峽口泐水
自華亭縣東出峽口流入縣境流四十里經縣城
北東入涇州界又有泐水渠在縣北一里唐李元

諒疏渠引納水蒔荷畜魚民享其利今渠尚存

白石川 在縣南六十里源出五馬山東流入靈臺
縣境為達溪川即長武黑水之上源也東至邠之
停口入於涇

赤城川 在縣南四十里至靈臺縣東北入於黑水
以滙於涇

左峪水 在縣西四十里銅城西南流入納

五馬峪水 在縣西南五馬山下通納峪水在縣北

臨洺堡右紅土峪水在縣西南迎駕坡左西寺峪水在縣南二里俱北流入洺

城東峪水 在縣東門折而西環城之西北以入洺

四峪水 在縣南縣志赤城之南三十里有龍峪水西南八十里有神峪水又十里有九峪水又新窰二水之交曰對峪水水匯而成川於赤城川之南白石川之北謂之四峪水可資灌溉

湫峪水 在縣北鳳山右南流入洺內有湫深廣里

許

散化峪水 在縣北鳳山左南流入汭殿子坡峪水
在縣北鳳山下聚貫珠濃露諸泉之水由滙口而
南流入汭

新柳灘 在縣西北一里汭水之濱傍有稻畦順治
間知縣武全文溉植

暖泉 有二一在縣東五里為上暖泉一在縣北十
里為下暖泉

康王井 在縣西北郭昔李武康王元諒所鑿以城
中水鹹汲納稍遠濬深一丈徑五尺得甘泉

華亭縣

隴山 在縣西三十里北接大漠南界汧隴高五十
里冬夏有雪縣西境之山皆隴山東麓其支峰別
阜隨地異名元和志小隴山在縣西四十里寰宇
記接崆峒山界

儀山 在縣東二里古儀州以此名通志一名義山

俗名回頭山

石堡山 在縣東至密頭土威望石為炭以埴器

華尖山 在縣北明一統志在縣西北二里縣居山之麓

斷萬山 在縣東北五十里府志自斷萬山極於五馬山號為泃水東峽

樺嶺山 在縣東五十里中多樺樹

王母山 在縣南一里山巔有古王母宮因名

海龍山 在縣西南十五里有泉東南流入汧水深

入曰寶蓋山火燄山鬼門關接靜寧州水洛川絕

人跡

仙姑山 在縣西十里

齊山 在縣西十三里與仙姑山連汭水南源出此

望仙山 在縣西北二十里

嵒然山 在縣西北七十里

朝那山 在縣西七十五里漢朝那縣以此名

湫頭山 在縣北六十里泃水北源出此即朝那山
山有湫池二其深莫測遇旱禱雨多應

白崖山 在縣西北筭頭山南涇水別源出此

龍馬山 在縣西北

高山 在縣西北山海經涇水出高山府志筭頭西
北曰高山即山海經所稱也亦名老山

瓦亭山 在縣西北一百八十里即隗囂使將牛邯
所守之地瓦亭關在其西麓東二十里即彈箏峽

飛鳳山 在縣西北一百里形如飛鳳故名

爛柯山 在縣北十五里見寰宇記

馬嶺山 在縣東北與平涼縣接界

見子巖 在縣東四十里世傳人失其子數載至此
見之因名

石香爐峽 在縣西北四十里其北又有松子峽

馬鋪嶺 在縣西北四十里

支磨原 在縣境東北郭汾陽家傳大曆十年吐蕃

界潘原西至小石門白草川又下朝那川至百里
城支磨原而入華亭子儀遣渾瑊破走之于故平
涼城今縣西南有水磨川或以為支磨原也

龍門洞 在縣南四十里

涇水 在縣西北八十里自笄頭山發源流經此入
平涼界

汭水 在縣東三里縣志汭水逶流城南有惠民渠
引經城中而北出以溉田

北水 在縣北一里東流與汭水合流入涇

柴底水 在縣北三十里明一統志有策底水即柴底窮汭記柴底水出朝那湫山之陽其北即涇水相去甚近

胭脂川 在縣西北一百一十里東流入涇水

武村川 在縣南十里武村縣西南十八盤諸泉為木賊溝延官溝水磨川武村川東至斷萬山匯於

汭

暖泉 在縣西南六里

鎮原縣

東山 在縣東二里極高峻其下為舊東山縣

玉山 在縣東十里山多白石陰雨之後明艷如玉

嶺有凌雲閣下臨萬仞

雉頭山 在縣西三十里狀如雉頭秦始皇二十三年巡隴西北地至雉頭山即此

鷄頭山 在縣西五十里隗囂嘗使其將王孟塞鷄

頭山道以拒漢兵

潜夫山 在縣內北東漢王符高隱於此著潜夫論

上有讀書臺

桃坡 在縣西八十里其地有桃萬株

風堆 在縣西十里獨阜上有故臺臺側有風伯壇

俗呼為風堆

和戎原 在縣南二十五里見寰宇記

陽晉水 在縣南平涼縣界流入寰宇記陽晉水在

臨涇縣南十五里入涇即涇州橫河之上源也

原州川水 在縣北自固原州流入寰宇記自番界
來

高平川水 在縣南二百步源出舊縣之大隴山

石門峽水 在縣西大隴山北有水逕流謂之峽水
自延水 在縣西石竇出泉汲焉

次水 在縣東北六十里與苦水東水亂流參差合
而為一下流入高平川

蓮花池 在縣西一里許旱不涸冬不涸舊植蓮花
故名

太陽湫 即大洋湫在縣東六十里半山中環五里
餘水澄澈深不可測旱禱多應又有任湫在縣西

新城里

石泉 在縣西一里許水從石孔中出四時不涸夏
涼冬溫民皆汲用

溫泉 在縣境冬夏常溫

聖井 在縣東九十里宋紹聖初竅石為龕建石窟
寺室內可容數百人內有井

九龍井 在縣西二十里一井九孔

固原州

六盤山 在州西南七十里曲折險仄盤旋而上元
世祖自和林有事陝蜀恒屯兵於此宋史紹定三
年蒙古主特穆津殂於六盤山寶祐六年蒙古主
蒙格侵宋次於六盤山開慶元年蒙古入蜀使瑄

塔罕守六盤景定元年呼必賚立瑄塔罕以六盤
軍叛走甘州廉希憲使汪良臣擊平之元元貞二
年自六盤至黃河立屯田置兵萬人明初徐達定
關中屢敗元兵于六盤蓋州境之險要也上有清
暑樓元安西王所建

臺山 在州南四十里

馬靡山 在州西南四十里臺山之西宋元嘉五年
夏主昌被擒其弟平原公定奔平涼郡魏兵追之

敗於馬麁嶺蓋平涼之險要郡國志作馬屯山誤
砲架山 在州西北一百二十里石城堡前四壁峭
立極為峻險明成化五年滿四反據此其相連者
又有照壁山

天都山 在州西北百五十里宋元豐四年伐夏李
憲自熙河進營于天都山焚夏人南牟內殿并其
館庫元祐二年夏人與西羌相結聚兵天都山元
昊臣野利常守天都山號天都大王

印子山 在紅古城西南十里絕頂有印跡如篆刻

狀故名

須彌山 在州北九十里上有古石門關遺趾又為
逢義山後漢建義初段熲討先零叛羌自彭陽直
指高平戰于逢義山大破之

掃竹嶺 在州西北百餘里其山高峰陡峻危橋深
洞過者不敢逼視為州險境土人借以備寇祠真
武神俗稱西武當云

青羊山 在州北四十里山頂有泉

清水河 在州西南四十里發源六盤山下東北流
遶城東北下流亦謂之葫蘆河至鳴沙入黃河

高平水 在州西源出州西南北流入寧夏中衛界
大黑水 源出隴山在州北一百十里流入清水河
又有小黑水在州北八十里流入大黑水又有須
都臧河在州北九十里流入小黑水又有硝河在
州西北一百里流入須都臧河又有海子河在州

西南三十里流入硝河所謂水有五源咸出隴山
左會右水總為一川也並入於黃河

南川 有二在州東南六十里為大南川在州東南
五十里為小南川舊志下流至平涼縣境入于涇
又有乾川在州東北一百六十里

朝那湫二 一在州東南十五里泉流有聲廣五里
闊一里餘波入清水河即古朝那湫秦投詛楚文
于此一在州西南四十里六盤之陰山腰有泉眼

東西濶一里南北長三里舊傳祭龍神潤澤侯處
二水相合方四十里水停不流冬夏不增減兩岸
不生草木旱即祀之以壺挹水置之于所在則雨
雨水不止反水於泉俗以為恒今周迴七里蓋近
代耗減明正德間因城中井水苦鹹難飲導入城
泮池由西門入環流出東門公私便之土人謂之
東海西海

甜水 在紅古城西門外味甘可飲居民引之以種

稻紅古城二十里入清水河

北亂池 在州西南七十里濶一百七十丈莫測其
深歲旱禱雨輒應

養魚池 在舊開城三里元安西王養魚處又名蓮
花池

暖泉 在州北五里隆冬不凍流入清水河一統志
以為即龍泉水

青羊山泉 在州西四十里泉在山頂

涇州

兼山 在州北五里有重山之義州之主山也

弇耳山 在州西南一里形如龍尾

筆峰山 在州南五里峰頂峭拔樹林陰密有水流

涇州曰朝那溝

回中山 在州西北二里上有王母宮下臨涇水俗

名宮山

米麩山 在州東南五里二峰峭絕南北朝盧祖遷

為涇大將指二邱為米麩寇遂遁還因名

青石嶺 在州西北亦曰青石岸青石原晉義熙三年赫連勃勃敗姚秦將張佛於青石原六年勃勃又南攻安定破姚秦將楊佛嵩於青石北原進攻東鄉下之唐大曆七年吐蕃下青石嶺軍於朝那城郭子儀諭却之十二年吐蕃下青石嶺逼涇州子儀復擊却之又貞元三年吐蕃入寇分屯潘口及青石嶺七年涇原節度使劉昌築保定城得青

石嶺皆即此

青溪嶺 在州西南宋建炎三年金羅索侵涇原經
畧使曲端遣將吳玠逆擊於青溪嶺敗之紹興中
薩里哈自鳳翔趨邠州涇州將田盛遣兵擊之于
青溪嶺寇引去

馬鞍坂 在州西北晉義寧十二年後秦將姚紹自
安定擊赫連勃勃于馬鞍阪破之

安仁谷 在州東南四十里古長城砦宋范仲淹嘗

遣宋良等控守於此地

碧泉洞 在州東北兼山之左其水青色長流味甘

涇水 在州北自平涼縣流入又東南入邠州長武

縣界州志涇河自邠以上灘淺流急故濁自邠以下灘深流緩故清至入渭處則涇清而渭濁也又曰涇河水石湍急故不能引以為利至涇陽則就平且蓄矣

汭水 在州東南二里自崇信縣流入境東南流入

長武界合於涇水

閣川水 在州南三里州西山谷諸水會流成河下流入於涇水

滄水 在州西南一名閣子溝源出州南二十里支家舖有暖泉潑流西北入汭味甘利煮豆與朝那溝皆嘗暴漲為居民害

後川河 在州北四十里發源交龍口亦曰橫河自鎮原縣流入經東北三十五里由淺河川至長武

縣界入涇州北諸谷水陽皆入涇陰皆入橫河

盤口河 在州南三十里與靈臺縣接界又東流至

長武縣停口入涇

共池 在州北五里華巖海印禪寺內水泉從地湧

出流溢成池兩池相連故名密人侵阮祖其即此

百泉 在州西三十五里泉眼百餘四時不涸民資

灌溉亦名百泉溝下流入涇州志涇汭灘高流駛

宣洩不能為利民間所資以灌溉者乃在陂澤源

泉其溝渠共有六十四道

暖泉 在州西五里宮山之陽水從石出四時溫暖
瑤池 在州西宮山之陽寶石而出俗傳為王母瑤
池

靈臺縣

蒼山 在縣東二里其山松柏蒼翠因名山之東有
白雲洞丹壑萬仞綿延漸低如龍延頸狀謂之龍
灣崖元清虛子煉丹處

保巖山 在縣東南三十里山勢峭拔迴旋百折嶺有涇臺登之望見百里外其下常有雲霧出入有九峯環匝一名九頂峯巖下臨南河有溫泉瀑布

離山 在縣西南二里狀如象形

虎山 在縣西北一里許

兼山 在縣西九十里為縣主山其山兩重因名

書臺山 在縣東北五里多奇木異獸甘泉秀石頂平如臺因名隋皇甫元晏讀書處又明一統志曰

臺山府志縣枕臺山東西亘百里荆花尤茂一名
荆山

鳳山 在縣北十里其狀如鳳俗謂之上山鳳

隱形山 在縣東北二里許孤峯突起日中無影蒼
松古栢連抱參天圖經云其色蒼翠而地深奧故

名

卧龍原 在縣東十里見寰宇記

白石原 在縣西北首起舊良原縣西南三十里東

下三十里分為二原一良原一杜原

望兒原 在舊良原縣東三十里

范家溝 在縣西北流入達溪其水亦足一方之養

汭水 在縣北自崇信縣流入

達溪川 在縣南二里縣之西川源發隴州五馬山
至邠梁山入涇邠志謂梁山黑水即此

姐已川 在縣西七十里舊傳姐已生於此即達溪
之訛也

蒲川 縣之南川也自鳳翔府分水嶺發源夾蒼離
而出與達溪合

細川 舊志細川水源出鳳翔府麟遊縣細川谷流
入縣境合於三交川新志細川水在縣東南二里
上流與蒲川合後魏高平賊万俟醜奴屯安定聞
魏軍未進乃散衆耕於細川唐初涇州鎮將劉感
自高塹引還涇薛仁果自南原馳下與感戰於百
里細川感為所擒

二香水 在縣東十五里源出麟遊縣東亦名三交水入於蒲川

香水 在縣東北隱形山麓味甘氣馨因名

小庵川 在縣南二十里自麟遊而來與蒲川合

後溝 源自景村經縣東北流入達溪其水甚甘一邑食之靈邑四境皆山有此甘泉信屬地德

三女川 在縣西九十里即宓康公受三女奔處因名

懸泉 在縣西一百三十里橫渠鎮石崖數仞上覆如幕有泉下注如簾為邑奇勝

溫冷泉 在保巖山之陰半溫半冷疾者洗滌即愈
靜寧州

隴山 在州東一百五十里舊水洛縣乃水洛川及犢奴水所出以近隴州之地因名

主山 在州南一百五十里山勢獨高其中峰嶺迴環溪流縈帶沃野千頃

旗鼓山 在州東二里以形似名宋劉將軍滬屯兵

防西夏處

翠屏山 在州南五里

武山 在州南七十里多產奇花異草四五月之間
絢爛奪目

石門山 在州南四十里兩峽平分斬截若門即隴
山北垂宋劉滬破氐羌於此

孫家山 在州南一百五十里脉接秦隴諸山號稱

陸海林藪澗澤深不可測

宋家山 在州西南八十里昔產牡丹色種艷絕

橫山 在州北十里山勢橫亘舊為番部所居

東山 在州東五里宋吳璘命子挺築堡東山以拒

金即此

魚嘴山 在州東四十里六盤湫頭之支林樹葱鬱

樵徑出入

西峰五疊 號五臺峰山麓有靈湫建龍君祠

雲臺山 在州南一百二十里連峰聳青長河繞碧
四時烟景縱目可收

石馬坪 在州西俗傳夜靜見羣馬食田衆以百矢
射之遂泯迹次日視之皆石馬也因名

邵家坪 在州境有古槐二株大十餘圍陰數十畝
相傳為漢晉間物

陳家洞 在州東南一百五十里幽林鳥道峭壁插
天深洞層樓下臨絕澗稱為奧區

西巖山 在州西七里有甘泉五

馬圈山 在州北八里宋二吳將牧馬處也

隴水 在州南一里源發六盤之陰按六盤為隴山尾故水為隴水味甘美俗名甜水河

威戎川 明一統志在州南四十里或以為即水經注之燕無方城諸水也

陽三川 府志在州南九十里自莊浪縣流入苦水水經注受渠水東出大隴山西經受渠亭北又西

南入瓦亭川或曰即此

水洛川 在州南一百五十里源發隴山流合犢奴川經石峽西南入秦州界

高家堡川 在州西四十里發源會寧青家驛之山中東流與甜苦二水匯焉

拋龍川 在州西宋任福輕騎趨懷遠捺龍川即此
長源河 在州西三里源發固原須彌山北味苦俗名苦水河

門扇川 在州東八十里源出六盤西流至威戎川

滙焉

底店川 在州東南一百一十里源出華亭之林家

硤西流逕都記川過莊浪入磨石峽以達於合河

頭

通遍川 在州東南一百二十里源出隴山逕林家

硤過佛崖灣西流至野照涼野二店滙章麻川

治平川 在州西南八十里一從鞍子山經通渭之

蔡家堡一經郭家岔至鳳龍之麓二水合流達合
河頭

溫泉 在州南五十里隆冬不冰又府志州東三十
里曰乾磴川有溫泉

莊浪縣

隴山 在縣東府志靜寧州東南一百五十里皆隴
山也又曰自隴州至清水縣綿亘而來縣居山之
陰今東暨華亭其間有鬼門關有火燄寶蓋麻庵

大小十八盤湫頭筭頭龍家峽等山以及美高六盤南北二百里東西七十里皆隴山也

盤龍山 在縣南四十里山勢起伏狀如盤龍即隴山之異名

杏花岡 即太白山在縣東三里高岡峻嶺上建太白行祠樹木森鬱祭禱有應

櫻桃園 在縣西三十里花發時其地如雪
牡丹岔 在縣西一十五里舊傳多產牡丹

屏風山 在縣南三里即邑對山如屏

北寺山 在縣東北二里即遊龍山樹木森茂登其

巔山川風景瞭然在目

筆架峯 在縣南三里狀如筆架因名

磨石峽 在縣西南一十五里

崔家峽 在縣西南五十里傳有石炭山狹水深不

可挖

青土坡 在縣西南六十里產白土

東溝水 在縣東卅說源出隴山經縣西南流入靜
寧州境注於苦水

西溝水 在縣西半里源出隆德縣之襟山西南流
入東溝水

東河 源自龍家峽來遶縣城東故名東河

西河 源自賈家岔來遶縣城西故名西河灣過城
南會東河從磨石峽出

陽三川 在縣西南七十里山陽有三川合流故名

府志流入靜寧州即古受渠水

苦水川 在縣西九十里自靜寧州流入境又北流入鎮原縣界味苦不可飲故名

通邊川 在縣東北三十里明一統志在縣東北一百五十里以道路四通而名府志在隆德縣南六十里蓋接界也通邊縣以此名

隆德縣

六盤山 在縣東二十五里縣城鎮其西麓即隴山

之支峰也通志山路險仄古謂之絡盤道

美高山 在縣東南二十里山高聳秀多產松竹藥
草底堡水出焉二山與華亭接界

龜山 在縣南二里

狀元山 在縣南四里峯巔秀麗迥出羣山相者以
為有狀元氣故名

襟山 在縣南十里狀如衣襟

鶯架山 在縣西南三十里

筆架山 在縣西二里一名燕家山

旗山 在縣西三里

鼓山 在縣西五里

鳳山 在縣西北一十五里

象山 在縣北一里

飽馬嶺 在縣南十里

湯羊嶺 在縣西北十五里

祭旗坡 在縣南六十里相傳宋曹瑋征吐蕃祭旗

於此

得勝坡 在縣南二十里明馬文升敗敵處

涼殿峽 在縣南七十里元太弟避暑處

隴水 在縣北西南流入靜寧州界水經注隴水東北出隴山其水西流又經瓦亭南合瓦亭水其後謂之好水

好水川 在縣西二里源出六盤山西流合苦水宋任福違韓琦節制敗於夏人即此大隴左右水皆

鹹苦不可飲間有味甘可飲者土人遂相率名之
曰好水或曰甜水正不可以一處拘也

底堡水 在縣南二里源出美高山西南流入六盤
水

清流河 在縣東三里

孤樹川 在縣北三十里傍有孤樹因名

馬蘭川 在縣西三十里多生馬蘭

瓦亭水 在縣西北亦西南流入靜寧州界水經注

其水亦出隴山東南流歷瓦亭北又西南與隴水合

武延川 在縣西北七十里宋史曹瑋知渭州與陳興秦翰破党項章惺族于武延川即此明一統志武延川昔有姓武名延者居此故名縣志謂之苦水河西南流入靜寧州境會於甜水河冊說苦水河源出固原之大六盤山諸水皆南道靜寧而東

入渭

各道水 在縣北二十里北亂湫之流也湫在縣東
北四十里周三里深不可測旱禱輒應亦謂之靈

湫

紅城河 在縣西四十里亦出靈湫即各道河下流

曹務河 在縣西南四十里與莊浪縣接界

南源河 在縣南一里源出美高山西流入於六盤
水

蓮花池 在縣東一里

官泉 在縣治東儒學南深丈餘味甘冽四時不涸
小水泉 在城內儒學西其水瑩澈居民資以灌溉
溫泉 在縣城東石穴隆冬不冰又有溫泉在舊隆

德堡

龍泉 在得勝坡下又有湧泉在神林堡內

線泉 在湯羊嶺西出山崖中高丈餘飛瀑下流如
線

慶陽府

安化縣

景山 在縣西一百一十里山多奇木怪石及產猿
獠獐鹿之屬

馬嶺山 在縣西北七十五里一名箭括左右帶川
相傳漢牧地有果實猿鳥之屬巖洞幽邃莫窮所
止唐置馬嶺縣蓋以山名

寡婦山 在縣北十五里五代史慶州北十五里有
寡婦山番部野雞族居之後周廣順二年拒命環

慶二州帥討平之又舊府志城北三十里有寡阜
砦

太白山 在縣北一百五十里黑水河發源於此

第二將山 在縣東北一百二十里峯巒高聳林木

茂盛其地居民富庶

鐵邊山 在縣北三百二十里頂平麓險川流縈遶

宋范仲淹置寨於上

白於山 在縣東北元和志白於山一名女郎山在

故洛源縣北三十里

秦霸嶺 在縣西南一百二十里舊名安花原俗傳秦穆公會西戎之地故名又金鷄嶺在縣西南一百六十里與秦霸嶺相接

橫嶺 在縣北十八里產鐵形如蟻螯製為小刀極鋒利

走馬嶺 在縣北二百二十里其嶺聳拔其麓平行相傳唐李靖大捷於此走馬還朝故名走馬嶺

白城子嶺 在縣北二百三十里東西綿亘二三里
上有白城

節義峰 在縣西北宋史景祐元年夏人侵慶州伏
兵節義峰

藥地峪 在縣南二十五里

西姬峪 在縣西南三里相傳為公劉子姓之居又
葉胡峪一名野狐溝在縣西北十里

黑泉峪 在縣城北十里東川之東其水流入東河

又嘉樂塔在縣北二十五里又葫蘆塔在縣北一百里

東原 在縣東其脉自合水來凡溝澗皆西流又西原在縣西自景山來溝澗皆東流為城左右之護彭原 在縣西南九十里其原廣袤六十里有彭原縣城舊址城內浮屠尚存

二谷原 在縣北五里一名慶原為郡城來脉又八珠原在縣東北二百八十里與環縣接古為明珠

番族之地

花坡 在縣東十里地名花木為郡人遊覽處相傳
不窰遺園

花村原 在縣西二十里

洛河 在縣東北二百五十里源出白於山經延安
府保安縣界至中部縣東南流入西安界漢志洛

水出歸德縣北蠻夷中府志在府北一百七十里
有蘆草溝即洛河之源又曰府北有白豹西羊橫

水諸川合流至保安縣界入洛河

按禹貢導洛自熊耳洛水發源商州冢嶺山經河南新安縣至鞏縣入河今此洛河源出白於山經延安府流入西安界是另有洛河名同實異非伊洛瀍澗之洛也

東河 在縣東來自沙漠白馬懷安柔遠川及延慶靈溝水南流至縣城東南會於西河南流至合水縣界為馬蓮河

西河 在縣西來自環河合馬嶺川楊集澗水谷溝
下馬汀諸水南流遶城轉而東南會於東河府北
三十里有下馬汀水濱地平經行者常憇於此蓋
即東西兩河之濱也

馬嶺水 在縣西北二十五里自環縣來東南流為
西河

泥水 一統志在縣北東南流入合水縣界漢志郁
郅縣有泥水出北方蠻夷中

白馬川 源出縣北一百二十里南流入東河相傳
古有乘白馬者至此馬跑泉出涓流不竭里人神
之立白馬祠於此

懷安川 源出縣東北二百里西南流入東河

柔遠川 源出縣東北一百八十里西南流入東河

延慶溝 在縣北三十里西流入東河

靈溝 在縣北五十里西流入東河

楊集澗 在縣北八十里東流入西河

太樂澗 在縣南五十里南流入珊瑚水至寧州界

水峪溝 在縣西北七十里東南流入西河

三合水 在縣西南一百三十里東流至合水縣界

入馬蓮河

珊瑚水 在縣西自環縣來合黑水蒲川太樂澗南
流入寧州界

北岔水 在縣東七十里自白豹川來南流至合水

縣會建水

白塔水 源出縣東北二百里南流入合水縣界

白豹川 在縣東北二百里東流過保安縣界又東

南入洛

教子川 在縣西四十里諸山環如駐馬其水東注
過城南又名底下河流入縣河

同川 在縣西八十里即故同川縣地其水南流入
珊瑚水

黑水川 在縣西一百二十里源出太白山東流與

蒲川合

牛園池 在縣西北二百里四旁皆石磧中有園潴
水人馬給飲宋章潔嘗置毒於此夏人來犯飲者
多斃

蓮花池 在縣南三里東西二河合流縈而為池舊
多植蓮

鵞池 在縣署後東城隈唐末從事李克新濟宋慶
厯中經畧安撫使施昌言重修暗通東河以汲水

鹽池 在縣北五十里有大小二池大池在定邊周
圍八十里小池在惠安堡周圍二十七里又有花
馬池紅柳池俱產鹽今屬寧夏府

清水泉 在縣西泉水澄澈冬溫夏涼

龍泉 在縣西三十里水甘冽鋪名以此

聖水泉 在縣西北三十里水清冽上有龍堂禱雨
輒應

麻家煖泉 在縣北五里其水清甘隆冬不凍

十二澇池 俱宋知州孫長卿浚鑿以備旱澇池底俱有石炭

合水縣

子午山 在縣東五十里南連耀州北抵鹽州東接延安綿亘八百餘里括地志秦始皇通直道故道在華池縣西四十五里子午山寰宇記子午山一名雞山山長千餘里北大漠南盡分水其東水皆東南流為延安界其西水皆西南流為慶陽界

直南直北皆隨地而異名

南山 在縣南一里許巍然屹立林木茂盛

豐峙山 在縣東南五十里故城川上多林木八稜

山在故城川北

錦屏山 在縣西四十里狀如圍屏

長厚原 在縣西南七十里

漢城原 在縣西九十里

麻峪 在縣南七十里故城川東

馬蓮河 在縣西南四十里來自安化縣合冉家河水南流入寧州界

合水 在縣東一里與建水北岔水合縣以此名西南流四十里入馬蓮河

建水 在縣東一里源出子午山合北岔川為合水又西南入馬蓮河

北川 在縣東一里即北岔水來自安化縣與建水合為合水

樂蟠水 在縣西南六十里南流入馬蓮河

清水溝 在縣西一里源出田家里南流入合水其

水清澈大雨霧沛不濁

神靈溝 在縣西六十里溝中央有山特起巖峻雄

峙上平坦寬濶至正間居民避亂於此兵至溝口

忽風電大作若有神靈擁護故名

故城川 在縣南五十里源出子午山南流入寧州

界為大延川亦名寨子河有蘆荻烏藥諸產又小

川出子午山東流入合水

華池水 在縣東七十里來自保安縣至此合豹子川平戎川苗村溝諸水東南流入鄜州界

豹子川 在縣東北一百二十里源出安化縣界西流入華池水

平戎川 在縣東北八十里源出保安縣界南流入華池水唐韓遊瓌敗吐蕃於平戎川即此

玉梅川 在縣東七十里源出子午山東流入華池

水

鳳川 在縣東七十里源出子午山東流入華池水
清澈多鷗鷺春月人皆遊賞於此

廝坡川 在縣東八十里源出子午山東流入華池
水

苗村溝 在縣東七十里源出子午山東流入廝坡
川

延鳩川 在縣東九十里源出子午山東流入華池

水

錫蠟溝 在縣東六十里入建水

慕原溝 在縣西十里

冉家河溝 在縣西五十里源出安化縣界南流入

馬蓮河

聖公泉 在縣南五十步昔有修道於巖壑者以杖卓地泉出能愈百病遇旱不涸禱雨每應故名

暖水泉 在縣南四里水性溫煥邑人修禱之地

玉泉 在縣西南七十里

寶泉 在縣北二十里寶泉寺泉歛出如貫珠

柳池 在縣西五十里漢城原之東

環縣

尖山 在縣東一百里山形聳拔因名

大方山 在縣西南相近有小方山其形皆方

五子山 在縣西鴛鴦溝上

青山 在縣西劉昭曰北地參綠縣有青山章懷太

子曰青山在馬嶺縣西北

牛家山 在縣西一百里牛訛奴族所居黑水河出
此一名火燄山

烏崙山 在縣北三十里山甚高峻頂濶根狹難於
登陟為險要之所宋於此置寨防守

青岡峽 在縣北亦曰青岡嶺宋史至道二年李繼
遷圍靈武詔遣兵五路救之李繼隆以環州路迂
由青岡峽繞靈武趨平夏行數日不見敵而還青

岡川本靈州大路自此過美利寨入靈州自過美利寨後漸入平夏經旱海難得水泉

天池原 在縣南九十里

板谷 在縣南唐大曆十二年吐蕃入寇軍於原州北長澤澗進破方渠入板谷郭子儀遣將李懷光救却之

石臺谷 在故方渠縣境唐貞元十三年楊朝晟築方渠三城發軍次石臺谷蓋慶州之要道也

環河 古名環江在縣西十里源出城北七十里水源舖南經城西委曲環抱石橋交跨小港分流南入安化縣界

甜水溝 在縣西三里源出固原州界東南流入環河又鴛鴦溝在縣西十八里有南北二山對峙形如鴛鴦故名又趙大夫溝一名城西溝在縣西十里皆流入環河

七里溝 在縣東七里流入環河又安塞川在縣東

四十里西南流入環河又木鉢溝在縣東四十里
源出安化縣界流入環河

合道川 在縣西八十里自固原州來二水相合故
名流入環河又蒼耳川在縣西九十里東流入環
河又馬嶺溝在縣東一百里西流入安化縣界入
環河又三岔溝在縣南一百里東流入環河溝旁
山分三岔又佛堂谷水在縣西一百里東流入環
河

馬坊溝 在縣西北二十里為固原州要路源自州界來流入環河又肅遠溝在城北四十里東南流入環河又清平溝在縣西八十里清平所東流曲折七十里入環河

黑水河 在縣西南一百里源出牛家山東南流入安化縣境其水色黑

鹹河 在縣北寰宇記從土橋歸德川同家谷三處發源水鹹苦不可食

天池 在縣南九十里池形如盤水溢不出

葫蘆泉 在縣西舊有蕃部居之宋范仲淹謀城平定寨於此明一統志泉在縣西鎮戎東

石泉 在縣南五里

真寧縣

羅山 在縣東二十里縣舊名羅川相傳唐天寶初得玉真人像於此因改縣名

橋山 在縣東七十里黃帝墓衣冠處即子午山史

記封禪書武帝巡朔方還祭黃帝塚魏收志陽周
縣橋山有黃帝塚

撫琴山 在縣南一里山畔有洞風過如琴音故名
雲寂山 在縣南十五里蒼翠干霄為縣屏障

泰山 在縣西南一里上有青帝廟

黎陽山 在縣西南三里

五掌山 在縣東北二里山有五峯其形如掌

雕嶺 在縣東五十里即子午山之別阜上有秦馳

道迤南為橋山

羅水 在縣南城下元和志隋羅川縣以羅水為名
即真寧河源出橫嶺合小川南溝二水西流又寧
州界入涇水又小河水在縣東一里東南流入羅
水

龍門川 在縣西十里自寧州來經縣西北四十里
南流入於羅水縣志南達豐鎬北通銀夏又長溝
水在縣西十里南入羅水

于莊溝 在縣東二十里南流入淳化縣界又南溝
在縣南二里南流入淳化縣界

馬槽溝 在縣西北二十里相傳馬伏波將軍過此
要冊湫 在縣東六十里橋山之尾周圍九畝旁有
龍祠唐開元中建歷代皆加封號寰宇記宋太平
興國二年封要冊湫普濟王為顯聖王其水無禽
魚萍草茂林陰翳旱澇不涸亦不溢祈禱立應碑
刻甚多

聖水泉 在要冊湫廟後

蓮花池 在縣東二十里舊產蓮花

溫泉 在縣西二里有三池皆夏涼冬煖

寧州

高山 在州東發自橫嶺迤邐而西至此豐隆特峙
為州來脈即因山形築為郭城稍東為安定縣故
址

鳳凰山 在州東六十里發自橫嶺突起如鳳故名

西山 在州西馬蓮河岸列峙城西

畫石山 在州西十五里珊瑚川上其石有文燦然
如畫圖

南山 在州南二里拱護州城前列如屏巖半寺廟
幽邃內有金沙泉過客多登覽山上有元將李思
齊故址

北山 即北坡達府之路距州一里其下即公劉舊
邑

橫嶺 在州東一百五十里州志即子午山橫亘南
北故曰子午其脊為廊寧二州之界明一統志橫
嶺在襄樂縣東一百里即子午山之別阜

燕原 在州東北六十里襄樂鎮後燕太子丹為質
於此故名後魏置燕州於此

安定巖 在州西十五里巖如潑墨石可鐫硯

涇河 在州南三十里自涇州來至政平驛與馬蓮
河合流入邠州界

馬蓮河 在州西二里自合水縣流入與九龍川合
流經政平鎮入於涇河

九陵水 在州東一百二十里川中有九堆似陵故名九陵自合水縣界流入合奢延川西南入馬蓮河一名九龍川

大延川水 在州東其源有二一自橫嶺白羊溪北流至羅山務一自武亭寨西南流至羅山務二水合流為大延川至襄樂與小延川合至寨子口與

故城川合又名寨子河南流過州城北名城北河
又達城西與九陵川合南入馬蓮河

小延川水 一名奢延川在州東一百里自橫嶺盧
保兒鎮發源西流至襄武城合大延川

珊瑚水 在州西十五里自安化縣來東南流入馬
蓮河川中有紫阿石可作硯川口有湫名順利泉
白羊水 在州東一百里一名白谷川源出白羊溪
流經橫嶺西北至羅山務入奢延川

走馬水 在州東三十里源出橋山東北流入長城
又東北注奢延川

寧水 在州東七十里一名寧江自真寧縣流入即
羅水也亦名亞谷河流入真寧界

濫泥溝 在州東二十五里源出太安原下西南流
至谷堆城入馬蓮河

柳葉溝水 在州北二十里源發早社原下西南流
入馬蓮河

天池 在西郭城下明萬曆初知州馬彥卿鑿暗導
河水於城內後寧夏李逆變城門戒嚴郡人賴以
濟飲上有亭榭可遊憩

冰波湫 在州南四十里舊有祠禱雨應

金沙泉 在州南一里沙色如金有泉懸崖而下入

九龍河

石溝泉 在州東北百步許味甘冽

暖泉 在州東南五里其水冬溫

甘肅通志卷五